

國朝常州駢體文錄

國朝常州駢體文錄卷第十七目

芙蓉山館文下十四首

金匱楊芳燦才叔

綠淨園記

靈芬館記

瞿花農洞庭汎月圖記

明誥授通議大夫翰林院編脩廣東按察司副使分巡惠

潮嘉兵備道青海魯公傳

金朗甫誄

湖南湘鄉縣丞吳君誄

外弟顧學和誄

周淑姬哀辭

通奉大夫四川布政使姚公神道碑

誥授朝議大夫湖南杭州府知府吳松厓先生墓碑

福建臺灣府鳳山縣知縣卹贈雲騎尉世職吳君墓表

容太空先生墓表

甘肅鞏昌府知府胡公墓誌銘

瘞老馬文

桐華館文一首 金匱楊揆同叔

荆圃倡和集敘

辟疆園文二首 金匱顧敏恆立方

重修梁昭明太子祠碑文 代

眞率齋初稟敘

國朝常州駢體文錄卷第十七目

國朝常州駢體文錄卷第十七

芙蓉山館文下

金匱楊芳燦才叔

綠淨園記

夫岩岫高奇則昏旦之氣變林藪深邃則華葉之美殊是以欲構林園必擇名勝劉孝標金華之誌王摩詰輞川之詩石淙丹壑逍遙公之雅游退谷杯湖倚玕子之素翫幽寂澄澹其獨適者已綠淨園者吾友汪紫珊先生之別墅也枕冶山之麓接瓦梁之城江川邇迤皋澤塊鬱樹五楸而表宅編六枳以爲籬仰跳岑之蔚藍俯方池之深翠松杉繞屋薜蘿匝檐離離花明螿蟄葉厚新雨初霽則一水到門夕景欲頽則諸煙合嶺萬綠如繪七淨布華園之名也殆以此歟先是尊甫芝圃公遠宦逾百粵之地投老築

三休之亭竹柏契其冲襟煙霞供其麗矚香分月竈寒桂
海之喬柯冷鑿雲根載鬱林之怪石居鄰慈澗飲汲廉泉
可謂儒者之風抗希往古君子之澤藻被來今者矣先生
上承堂構夙嗜緹緇子安標珠樹之聲叔寶擅玉潤之譽
澹忘世味靜耽道腴遂乃緝仲蔚之廬開元詔之逕宋廬
不改其舊棄枕不耀其華文杏之棟可以棲雲香茅之屋
可以賞雨管酒槐脯招蕭澹之逸賓蚪篆靈懸搜邃古之
奇字水竹畱客鷺儵親人饕餐松煙鶴唳蘿月僊僊手尋
物外之嬉娛忘寰中之棲屑焉若夫山眉半黛掄影一枝
北窗涼颺西隔朝爽拈花證偈則笑語皆香蔭樹垂綸而
衣裾盡碧鷗波泛雪花風颺雲煙筱千竿露荷萬柄空波
無際時聞騷客之吟拏音已遙猶和報郎之唱吾師簡齋
先生題曰小滄浪園之最佳處也是則思話琴尊之賞羣

雅輔其心靈少文山水之圖萬趣融其神思他日者流泉
出山將布潤於大野行雲離岫彌增戀於舊林安石登朝
山澤之儀故在幼輿入宦邱壑之韻獨存仕隱雖有分途
蘿袞原無二致正不必守樂志之篇誦遺榮之賦矣某家
空四壁室賃半椽安蕙軸以忘機甘泥水以自蔽金臺石
室游僊之夢終虛艾席葭牆買山之資未辦所恃者懷榆
合契椒桂同心將躡屨以尋君定緘書而招我一觴一詠
半葉半花擷笛涼波篷背譜還雲之曲停鐙小閣樽前賡
團雪之詞索豪素之古歡訂林霞之息壤素節初屆塵襟
乍攄迢迢昔岑采采蘭訊撰爲此記青鳥明之

靈芬館記

嘉慶戊辰孟夏某與頻伽先生同寓于西湖詎經精舍神
交廿年簪盍一旦切肺酌酒傾心論詩于時林雨暝滴湖

雲曉涼羣漚欲仙萬綠如夢締夏首之新賞拾春餘之隱
歡時招逸朋同泛孤櫂攜笠澤之釣具選柯亭之篋材流
連淡旬情話彌洽先生辯慧君子騷雅俊人韋弦之贄徧
于區中淵海之譽溢于甸外猶復禦寇嫁衛伯鸞適越寄
跡苟簡之廬書券不貸之圃家公舍人時與爭席販夫蕘
豎難爲卜鄰比來魏塘始獲寧宇依桑架棟鬻茅作堂橫
鶴柴而啟門俯魚蕪而築塢神經怪牒積疊半牀珠匱瑤
函藏弄萬卷晨餐夕膳賡雅什于蘭陔熙春凜秋奉輕軒
于議室加以三荆表宅六枳樹籬機雲之屋東西求點之
山大小伯歌季舞笙簧典墳弟勸兄酬酌文史萼跼若
此樂不可支況有高柔賢婦子廉仁妻蘆簾紙閣青琴雙
聲彤奩玉臺明鏡儷影有倡隨之樂無苛妒之嫌投畚遺
榮賃春偕隱達士拔俗詩人甘貧吾愛吾廬從其適也昔

敬通見抵扞元眇之思孝標發憤著同異之論遭骨肉之
招軻悲身世之屯蹇先生則榮悴不擾其慮得失不概于
胸室無勃谿世非鑿柄而述馮生之顯志揚屈子之靈芬
義取斷章勿泥其旨焉某好聞棲遯樂在林藪而無五畝
之宅一稜之田張融牽舟孔嵩傲屋鄉夢依依鶴猿招我
孤蹤泛泛鷺儵笑人尋文通論隱之書讀公理樂志之論
不禁中懷之悵惘也

瞿花農洞庭泛月圖記

洞庭始波木葉微脫千古惟希逸之賦能傳望舒之神讀
之心骨清冷毛髮灑淅每欲題五渚之帆縱三湘之櫂也
花農先生自號漫郎出作散吏騷情蕭澹詩思清深叩舷
洞庭擊汰秋月于時空水無際長煙乍收太虛四垂如帳
碧玉圓珠裴裒素華上浮君山空明溼翠欲滴洲小如豆

船輕于鳧叢芮瑟瑟不聞鴈鷺之聲斷雲離離似噓魚龍
之氣揚舲獨邁不知身之在塵世也蓬心太守孤情絕照
淵懷洞賞鍊魄瑤圃瑩神冰壺興酣作圖水墨俱化靈瑟
罷鼓娥簧正寒祕怪恍惚傾耳寂聽廣樂振野洪濤殷牀
以茲畫手儷彼賦心前謝後王竝臻神品矣花農家本包
山宅近林屋吳楚遼闊洞穴潛通金庭玉柱之天左神闕
虛之府郭景純所謂巴陵地道也茲乘一葉遠陵萬頃孤
月照影微霜沾衣松醪一尊鐵笛三弄能無觸渺渺之仙
心增耿耿之離思邪東華薜茷燂暑未熾涼露滴硯綠陰
眠琴冰簟風簾展對此卷彷彿象月抱流連霞蹤歌碧霜之
辭舞玉煙之節塵襟頓滌清思忽來灑墨濡豪遂爲之記
明誥授通議大夫翰林院編修廣東按察司副使分巡惠
潮兵備道青海魯公傳

公諱元寵字君世號青海浙江會稽人魯氏自政成三異
學興五經荷擔吐奇佐南邦之霸業執簡抗節振西臺之
直聲世非曠僚代有明德公生而穎異長益魁奇身若植
簞目如巖電以班旂之碩學兼蔡邕之逸才下帷專思重
席擅業萬厯戊午順天舉人崇禎戊辰成進士釋褐授江
南徽州府推官作平刑之司理轄捕盜之督郵赤棒宣威
形幟問俗時有布估二人爲盜所殺守收已捕一人抵罪
公廉得其冤密以布估所遺圖記遣人四出買布與圖記
合者究所從來遂獲真盜四人寘之法崇龜治庖饗客卽
辨屠刀傳炎縛柱鞭絲能看鐵肩遂平疑讞共頌神君旣
乃薦牘交推璽書特召表陽城之治行獎龔遂之循良莊
烈帝臨軒策試趙充國屯田議公援筆立就恢張智略洞
悉機宜十二事徹戊己之邊防八千人增庚戌之土斷議

上稱旨曰魯元寵不特政事第一文章亦第一卽授翰林院編修郎官報最入爲俠御之臣法星移垣遂直文昌之府司李之遷館職者自公始蓋曠典也時則簪毫左掖曳綬中朝人稱池上夔龍帝倚禁中頗收法咫尺多所淹通公望公才隱然丰采中涓鼎貴欲與交權公崖岸自高危言謝絕勝朝寵任闕寺獎躐威權二孽之醜雖燔四星之光復熾張彝憲按行兩部高起潛監視諸軍金貂右瑤出入殿省苴茅分虎陵轢公卿時有大奄謂公曰魯翰林風流大雅不久將登台輔矣他日南北兩衙能和衷共濟乎公直視不荅王墮國士詎識董榮李膺黨魁何知張讓態臣因而側目朝貴爲之寒心公夷然不屑也未幾奄人陰嗾吏部出公爲廣東按察副使分巡惠潮邊隅凋劫之區海裔華離之地丸探赤黑變起倉黃公乃誅惡子之狼

貪懲姦胥之虎飽亭公督父戶設游徼里尉鄉師野除鈔
暴卒使梟風革面狐火潛蹤牛脫佩而朝耕雉忘羅而春
乳羣僚徧德比戶懷恩以視雄文驅惡溪之魚惠政感零
陵之獸炳耀方策今古同符三載還朝遂乞歸省以沈太
君有羸老之疾無復仕宦之志北堂護竹南陔采蘭浣石
建之憂視崔邠之膳與弟都憲晉侯公友愛臻至晨昏必
偕杜門縣車不與噴室之議編羣折撻惟定禮堂之經時
當霄路烏號虞淵日薄羣飛海水已蔽天杭隻手夸娥難
扶地軸魯王監國以左副都御史召不赴薰銷龔勝之年
艸沒孔珪之宅韶光匿耀肥遯以終公爲推官時再攝歛
篆又攝休寧篆拊循孤弱鉏治豪強路絕行禽市無訛虎
迄今徽人與潮人兩地祀之祠王渙于安陽之亭圖朱穆
于東都之驛遺愛在民非偶然也公充庚午應天鄉試同

考官庚辰會試同考官璣鏡當胸靈珠在握鑿拔雄駁提
拂孤寒伯鸞一顧重于簾金展季片言信于岑鼎凡所品
藻半持鈞樞游殷識張旣于童牙王修賞高柔于早歲蓋
薦賢報國公之素志云公猶子謙庵先生仕 國朝以銀
臺卿外謫亦任惠潮有善政張猛仍蒞涼州杜緩再來蜀
郡辭內史之磐石劉丹陽之古柳後先輝映鄉里榮之公
文孫和仲先生夙有異稟幼多咫聞潛心道淵馳譽藝圃
枕經靡典袁伯業之嗜書規箴矩模鄭次都之勵行纂輯
家乘建立宗祠敦倫睦族克承公志謙林移居蕭山今已
五世仰公穆行樞公遺事胖胖兢兢惟恐失墜將鐫樂石
屬余補傳汝南先賢襄陽耆舊政援斯義陳其梗概謙庵
和仲例得附書傳之雲仍敬俟惇史

金卽甫誄

元黜紀年蕤賓旅月清故翰林庶吉士仁和金君朗甫以疾卒於邸舍年僅二十有七嗚呼哀哉月沈朧輝花凋暈采是殲才子實喪俊民若其才性都長風儀淵令知言九變敏逾陸生異字千名富於朱育英辭壯思殫見洽聞識安釐冢之古文緝顯節陵之墜簡賦以高麗見奇詩則清工入妙狹襟單慧者莫測其涯量也文戰屢捷巍科早登以通博之才與清英之選羅合則胸吞彩鳳阮籍則手搏赤猿桐露槐煙之什老宿傾襟蘭臺桂苑之篇名流袖橐方當分榮鳳掖被蔭鑾坡晝日濡毫陵雲授簡何期時當大瘠景值凋年墨翟逢王侯岡巵丙擊轡欲騁而驥驟之步中徂舍香甫越而蘭茝之華蚤落幽局長閉昭途永隔嘻其酷矣能不悲哉某年當疲莫跡尙飄浮公榦著論空負經奇文舉屬詞多傷偏宕君顧癖同癖嗜密締心知味

菜逾時然糠永夕時或逍遙閒夜徙倚涼雲魚鳥流連竹
肉諧婉雖春星墮杯曉露沾袖不自知其沈頓也隙駟不
留濛陰遽戢埋玉樹於重泉鬱青霞於修夜韓卿長逝論
詩孰辨音初輔嗣云亡談易誰知繫表嗚呼哀哉昔袁炳
異才文通作傳孝若素交潘岳著誄敢援斯義爲之詞曰
文星系絕光嶽精淪崑邱碎壁凌門落鱗澗溟始奮扶搖
未申曾不中壽喪此哲人翳惟哲人神姿夙悟篤嗜典墳
殫精細素麗藻風飛高辭河注耀羽丹山揚輝元圃館啟
翹材名登上第射策東堂讀書中祕子野博聞承天多藝
行對三雍待成十意方題朝籍遽執殤宮泣瓊兆夢巢鷺
徵凶朝薤晞露秋條迳風行善遭命懷和告終疇昔交期
忘形語默臭味風雲談諧翰墨星晚露初銜青月黑促坐
論文徵言相得舊歡已矣宿諾何追壞陵弦斷山陽笛悲

西樹長靡南雲易頽行行孤轡寂寂遺徽嗚呼哀哉

湖南湘鄉縣丞吳君誄

夫義風振世秩何愧乎末班修名冠倫數何歉於中壽赤
石不奪獨守耿介之心沈檀甘焚不銷鬱烈之氣古來節
士多出卑官黃綬榮於龍藻銀佩美於垂棘如湘鄉縣丞
吳君者信有徵矣君諱英玉字玉泉蘇之常熟人也周章
令族孰哉華胄代有名德世非曠僚君生負瓌姿幼秉琦
行班管在手風雨蜚聲蓮花插腰虹霓耀彩無如射策不
售贖帖徒勞喟然曰丈夫處世安能碌碌爲章句儒乎遂
焚王壽之書擲逢萌之楯明習吏事揣摩兵鈴以武功爵
起家得楚南零陵尉拊循編戶矜恤臯人有陸景倩之真
清行員半千之實惠三年書考以卓異聞時值蛇巫不靖
犬封構孽君勇氣慷慨雄心憤薄短後從軍之服高前卻

敵之冠宵眠沙磧笑看宛轉之刀曉渡冰河淨洗連錢之馬
餽餉無缺轉輸若神時嘉勇郡王總統戎律目元康爲
快吏上許歷之雋功特擢湘鄉丞君激揚自勵奮發敢爲
密箐叢林佻身獨往嬰灰箭火舍命不渝受瘡癘之毒淫
櫻風霜之爪甲積勞成疾閱日不甞按劍撫膺空餘裏革
之志攬鏡照影知有犯兵之欄隨總兵花連布移營冷風
坳巨猾恣睢列營屠潰君力疾抵拒斃於馬鞍山下嗚呼
哀哉幕府愍君勞績奏牘上聞 詔贈國子監學錄賜金
祭葬從祀忠義祠錫以儒冠祀之宗布槃瓠革面遂偃靈
臺之旌鳴鴉變音迺獻泮宮之馘君之英靈可以慰矣夫
誅以美終文由累行安仁操翰表汧城之功延之緞辭昭
清臺之節式遵前典迺作誄曰

矯矯吳君古之節士徒抱高才而無貴仕低首風塵卑棲

棘枳誓命戎行不甘委靡壯氣飛揚龍阿知己實命不猶
若擠而止膏明則燿玉纈翻毀君之入仕不卑抱關一命
之吏威惠克宣山多義鳥地有廉泉三年報最輿論稱賢
蠶爾苗頑挺灾荆楚鋒蝟斧塘公行呂鉅上將專征統茲
勁旅君請鑿行枕戈負羽蹙穿膝暴執獲搏虎不避阨危
寧辭茹苦頭塵不浴衣焦不申峙芻魯遂轉粟秦困馳驅
盡瘁忠以忘身炎風委火蠻烟瘴雲蛇涎吹蠱域沙中人
遽嬰沈痼竟邁艱屯精魄銷亡壯心未已磨盾作書據鞍
爲几笮鼓翻營力疾而起深溪瀉瀑危峯屢屢攀藤附葛
賊來如蟻被髮呼天慷慨赴死齋志以終沒而猶視嗚呼
哀哉煢煢孤嗣亦抱亮節隻身提劍萬里負骨脫命鯨牙
招魂馬鬣乞彼高文鐫此貞石九重軫恤殊恩祇承錫之
儒秩名德已升國殤往矣精靈有憑爲書素旗余言可徵

外弟顧學和誄

并敘

維乾隆四十七年秋九月己亥外弟顧君學和以疾卒於伏羌廨舍春秋二十有六嗚呼哀哉余舅氏雙溪先生以名進士出宰楚南中年殂謝哲嗣四人君其仲子也伯歌季舞竝峙英聲三筆六詩咸承家學余方穉齒卽依外家垂髮齊年連茵接席相知之深膠漆莫能喻也君蘊吐鳳之俊才表植鰭之雅度相樞賦就總角知名芍藥詞工瑀車馳譽先君子器之以余妹字焉聯何劉之世親締潘陽之舊戚手足之誼在昔已深骨肉之情自茲彌篤乾隆庚子余竊祿邊陲得伏羌令時太夫人版輿西來君亦相從於官舍焉春華秋月佐我承顏夜燭晨鐙勸君勤學聯牀聽雨蠟屐登山補童年之墜歡破旅人之孤悶時或親賓宴集觴酌流連蒲籜相娛竹肉間作君獨彬彬安雅不激

不隨所謂玉韻能和珠光無類方君標格殆近之矣伏羌
舊有朱園書院辛丑春余延君主講席從遊者百有餘人
君論史疊疊說經鏗鏗縣河俟酌洪鐘待叩問奇盈座益
廣其咫聞還贅踵門無勞於影質青衿髦士組帶儒生無
不仰其褻誘服其通博焉君體素清羸端憂善病衛叔寶
自憐身世祇解言愁盧詢祖早擅才華恐難久壽蟲號鳥
歎詩欲成祇弔夢歌離文工作識余心竊憂之未忍言也
無何家書來妹一女孀君壻鄉漂泊方對蓬轉以驚心子
舍迢遙忽念杏殤而殞涕青蓮寄遠之句最憶平陽陳思
歎逝之辭偏哀金瓠鍾情過甚排悶無方時怳怳若有亡
獨怍怍其不樂膏肓之疾根於此矣猶復疲精圖史刻意
縹緗鐵錘竹素無非咯血之由蠹粉共煙盡是傷生之物
子雲才竭腸胃俱流李廣心勞精神先去欺魄之形漸槁

殮殍之病不斟長桑路遠莫致良醫元父地窮難求上藥
雀藏覆斗知思話之將亡鵬上承塵兆賈生之長逝嗚呼
哀哉君雖當疾革不改神清發篋理衣呼湯頰面蘇詔永
訣恐旅櫬之難歸李賀彌留念阿嬰之已老嗚呼哀哉僧
舍一棺家山萬里元夜表思歸之夢異鄉畱羈客之魂使
爾棲棲呼余負負今則丹旄將發靈輜欲行關路險巖風
煙慘愴元伯喪歸死友誰爲范式荀郎年少後事反託鍾
君嗚呼哀哉痛矣孤嫠傷哉余妹堂前衰白尙有慈親膝
下悽涼並無弱息棄砧何在盼化鶴以歸來琴軫長拋撫
離鸞而慟絕雁行如故隻影疇依荆樹依然一枝獨悴嗚
呼哀哉某飄零羈宦契闊親知顛躓頻仍憂虞日積君復
棄我早世卽冥知音已逝獨何心於世緣後會無期悲莫
深於長別天高難問命也如何嗚呼哀哉乃作誄曰

憶在穉齡爰依外氏與君昆季共肄文史撫塵而遊聞音
而喜密契微言如石投水君方總角誕茂英標華敷巖桂
穎發陵苔偉節最怒阿龍自超豔隨驥尾詎作蜂腰舊戚
新姻門楣有慶延明奮衣太真納鏡共羨冰清無慙玉映
骨肉情親彌敦愛敬繫余竊祿奉檄隴頭輕軒迎養君亦
來遊殊鄉握手情款綢繆看花命酒曠月登樓朱圍山前
茅堂竹院奉手橫經諸生北面茵菲緹緝耕耘筆硯循循
善誘孜孜無倦仲宣體弱子建憂生專精文藝銳意科名
櫝中玉韞掌上珠傾羈愁莫釋旅病交并營魄若亡形骸
漸槁靈藥難求神巫莫禱黯黯夜泉悠悠穹昊陸厥無年
龔生竟天悲君屬纊適值蕭辰鐙昏月黑霜酸露辛長懷
故土永念慈親聞茲苦語疇不傷神僧舍數椽我館我殯
星灰一周倏不逾瞬送君歸里靈輿發軔絮酒淒涼關山

阻峻哀余弱妹違此憫凶輕塵短夢斷雨零風長離泣鳳
半死悲桐天長地久銜恨何窮交契難忘音儀在目春雲
等潤秋蘭同馥君之淑懿宜膺多福弱齡隕逝神明何酷
猶憶寒夜一鐙熒熒子文我定我歌子聆盼君翔躍慰我
飄零如何背世長卽淪冥死別吞聲沈冤莫訴已巳金骨
嗟嗟玉樹此日分歧何年題墓流慟斯文庶通幽路

周淑姬哀辭

乾隆壬子歲周君鏡塘抱愛女之戚寓書於余示以詩什
陳思哀金瓠之辭樂天悼金鑿之作哀感悽豔動人心脾
余悲夫花隕春蕤月淪鼉采賦質何淑稟命不融震靈聚
窟方無續命之藥陰天紂絕路斷返魂之期況乎弱質易
萎蕙叢已亡孤神永傷奉倩亦逝尤生死之殊感骨肉之
極艱矣泚筆和墨遂成哀辭將以述逝者之懿媿抒吾友

之優咄云爾辭曰

何斯人之婉嫵兮毓秀質於闈房含菱扶以承景兮結蕙
若而懷芳習陰臣之六禮兮嫺女誠之七章爰履順而蹈
和兮洵金昭而玉粹惟太冲之愛女兮憐織素之明慧啟
形箴而奉手兮弄斑管以揄袂偶鍼紵之閒暇兮儼綈帙
之相對泊于歸于望族兮嫺戚紛其有喜從魚腹之育育
兮戴香纓之纒纒作三日之羹湯兮潔中饋之滌灑威姑
稱孝兮邱嫂推賢積勞成疾兮鍼石難痊飛龍骨出兮熊
失嫺妍雖殫殫而自力兮曾不形其燕媿猶嚴妝而視夜
兮供梳篋之帖妥迺隨翁而遠宦兮逐魚軒于山左別姑
姊而言邁兮淚瓊瑰而交墮同齊女之悲思兮望吳山之
駮駮處海隅之卑溼兮百沴劇以攻中竟形神之遽離兮
乘蓬島之回風遺弦在匣兮長簾牀空綠苔生闔兮永闕

綦蹤槍珠沈而香殄兮終莫慰乎賢雄旋弔夢以歌離兮
倏悲黃而思綠嗟仲祖之無年兮痛韓卿之不祿詎隨唱
于泉臺兮敏雙飛之逸曲秦簫月墜兮楚挽風淒青曾黃
頰兮生滅難稽何椿齡與蟬晷兮概百年之大齊庶令名
之難朽兮冀靈光之不迷肩喻塵而陳辭兮揚馨馥于璇

閣

通奉大夫四川布政使姚公神道碑

夫雲屋架構楸枿之質千尋神冶坻鎔龍阿之鋒百鍊震
風陵雨識其旃苾之功錯節盤根展其斷割之用遂乃起
家令牧陟職藩屏國家倚爲寶臣疆場樹其奇績而積勞
匪懈宿疾不堪命不副其才名可永於世吾於方伯姚公
見其人矣公諱令儀字心嘉別字一如松江婁縣人曾祖
某祖某考某均抱淳溫之德表愷愉之美積有家慶誕生

國楨三世皆以公貴贈如其官公幼卽岐嶷長而通健九
變貫知言之選八能推冠古之才逸藻瑰詞驚其儕偶高
名僑譽著于鄉閭弱冠補博士弟子員丁酉科選拔貢生
飛虞籥雲靈虬縱壑充方閫之賦登拔萃之科朝考一等
引見以知縣用漢時循吏半出明經唐代郎官皆由博士
分發雲南署祿豐令兼攝易門縣事改署尋甸州知州九
章惟精三政成理換辭恭之劇縣典邊讓之方州令典具
張流庸胥復總督誠嘉毅勇福公器異之適四川有警福
公移節鎮蜀奏以公隨幕府陳孔璋之才筆初歷戎行溫
簡輿之籌謀宜參軍事首出奇策屢收雋功歷健爲仁壽
二縣令晉石砭同知以握文之敏士爲奮武之力臣軍戎
以濟無慙汗馬之勞才幹方申祇膺展驥之任時廓爾喀
酋長侵擾西藏將軍鄂輝奉命進討公隨營籌辦糧餉夷

庚星運卷甲風馳預侍邊儲飽揚士氣以至繩行沙度道
路跽難雪嶺冰山氣候凝沍而猿攀狻附符節應期魚頰
鳥附輜轡不絕鄂公調四川總督尋以罪降孫公士毅爲
總督福公爲大將軍皆檄公入幕公以旣許鄂公從之不
去雖大將幕中書記爭招阮瑀而故侯門下賓客獨有任
安不隨流俗以轉移猶見古人之風義 上聞其事以公
爲賢特賜花翎擢雅州府知府泊廓爾喀事竣調成都府
知府民萌徧德僚屬仰流文翁之治蜀郡石室談經王襄
之隸益州青衿習禮方將布鍾離之條教振蕭育之鋒棧
而槃瓠之種挺灾板楯之蠻構孽福公時以雲貴總督爲
大將軍前往征勦檄公至其軍公復衣成慶之服稱媢從
戎佩赫連之刀慨慷就道墨磨盾鼻米浙矛頭飛盡嘘烟
跼鳶墮水俯弓弢而咯血聞鏹斗而驚心當赤白囊之交

馳及朱墨圍之錯置猶復闌書七紙立艸萬言先是大將軍以西藏之役徵公未至有憾於公至是知公敏達之才獨任賢勞之責猜嫌盡釋禮意有加將列刻章擢之峻秩會大將軍與人毆都司徐某於營門公叱止之不聽兇逞狠心惡逾雕面肆其抵觸任彼併張遂禽杖之一夕而斃申金布之條肅銀刀之隊彊項而出董宣格湖陽之奴戴頭而來段尉誅郭令之卒暴橫以戢風規凜然公旋以勞疾請假而大將軍亦薨于軍無何盜起潢池氛纏井絡叢林鷄跖篝火狐鳴三巴煽張角之祇五里起雄鳴之霧時威勤勒公總帥全蜀卽拜經略之命公以鹽茶道參其軍事奇謀六出嘉慮四迴掌運地圖手爲天馬軍中所獲俘囚命公訊鞠全活者數千人元惡旣殲脅從罔治德星鏡朗貫索躔空智燭犀然覆益光照蒙禔濟物其功溥矣威

勤公因事被逮公護送入都事雪仍權蜀帥時數大帥相
峙公勺藥其閒勤其和一家使甘凌釋忿廉藺交歡主將
同心偏裨効命金湯天壘雷電皇威走魅奔魃覆巢薰穴
變巫砥屬水絕鯨鯢巴焚囊懷山無梟鵠全境救寧公有
力焉嘉慶六年竦鹽茶道任逾四年升按察使數月之內
清釐積案六百餘事雋不疑之明決徐有功之寬平以公
方之詎云多讓次年升布政使威勤公推誠論事虛己測
交秤量人物知公無輕重心操縱紀綱倚公如左右手公
亦翺翺如畏翼翥竭忠文案自環竿牘無滯覃思損壽積
疾成灾初公在軍中得失血證至是增劇遂請解任調治
而終以不起空謁三醫難求上藥壑舟遠貿風燭俄驚僚
案軫捐玦之悲閭里深輟春之慕嗚呼哀哉公內行深淳
天懷篤摯崇厚以培先德敦本而瞻疏宗仲海季江勛之

庭誥僧彌法護示以義方接物無媒但之言論交尙綱直
之行泊乎當官剽劇臨政撥煩帷幄佇其謀猷典憲資其
整輯祓躬樹善濡迹拯民斯又雅操金貞冲襟玉粹者也
芳燦與公交本齊年誼深同諧又與弟揆其參戎幕俱掌
藩條未及十年後先湓逝宣勞盡瘁難保玉躬急景凋年
易銷金骨公之亡也某尤有隱痛焉公以某年某月日卒
於成都年五十六子椿樵奉公匱歸里於某年月日卜葬
於某原姚比部爾孫兵備星衍皆賢達素交文章雄伯既
作銘幽之誌復爲表墓之文某稔悉平生眷懷疇昔總持
撰陸襄之誄義在酬知蘭成著蕭永之銘感深思舊屬以
關河羈泊衰病侵尋杼柚於懷載更星紀悲銜于口愧在
其肝是以濡染丹臺應文度再三之請摩挲樂石書太邱
第二之碑銘曰

倚歟哲人崇情遠迹畢牢文菟驅馳翰墨蛟龍入懷風雲
在腋裕乃經猷展其輪翮拔萃書判起家雄赤環流治諧
屈蟠兵策玉帳唱籌柳營飛檄壁壘星陳煥糧山積筆奮
神錐弓開伏石捷應捶鉤響聽鳴鏑才識開敏風裁勁直
強崩虎牙威觸龍額懋賞疊膺崇階滂陟身冠柱鐵烏臺
列柏參井大藩蠶冕舊國萬戶承流百僚舉職帝納嘉
謨人傳偉績中壽未登徂年遽迫蜀日頽光棧雲晦色華
屋山邱佳城窳窳陳寔高名劉寬盛德爰樹兩碑千秋不

泐

諸授朝議大夫湖南沅州府知府吳松厓先生墓碑

夫惠能及物者方金石而彌壽文足傳後者比桂椒而信
芳有鸞鳳之采性自異於鷹鶴具騷雅之才識早遠乎刀
筆是以兒寬本經義而奏獄詞任延以儒術而飾吏治文

章政事道本同原循吏儒林美能竝擅如我松厓先生者
斯其人矣先生諱鎮字信辰號松厓甘肅狄道人韋少翁
五世壙僚汜穉春一門篤行載在家牒協於鄉評先生幼
秉異姿弱遭偏露未承過庭之訓空畱鑿極之書魏太恭
人育而教之然糠照讀截蒲作編追涼蔭以移牀隨月光
而升屋子雲沈默雅好立言春卿蒞藉深明經術方聞日
廣時譽斯歸十七補博士弟子員辛酉選貢成均老宿傾
襟儕流斂手讀士衡之賦君苗硯焚見希逸之文陽源筆
閣時山左名宿牛真谷先生作令平番因從遊焉傳細席
之言授禮堂之簡河汾弟子雅重辭收東京學堂獨尊庾
乘庚午舉於鄉先後赴禮闈者八而六薦未售庚辰大批
二等以敎職用初選耀州學正再授韓城教諭明山賓屢
作學官元行冲願爲都講含經味道折芟燔枯先生怡然

自得也既迺幕府交推剡章特薦謂先生才足以膺緊望
德足以撫華離引見授山東陵縣知縣解巾赴郡露冕班
春種桑百株拔薤一本徹唐邕之簿替羣吏唱名稅顏斐
之薪爲諸生炙硯竿牘稍閒不忘細素撫綏有術尤愛文
儒下教而子遠踵門側席而龍邱備錄民依若母士奉爲
師甲午歲壽張王倫作逆先生解馬至夏津大府飭在營
諸州縣窮治餘黨先生察其迫脅株累者請之大府全活
者數百人楚獄無濫賴寒朗之寬平廣陵獲全服張綱之
膽勇神犀自秉光燭覆盆亂羊旣除風清貫索數其陰德
蓋非尠也嗣因獲鄰邑盜犯保薦擢湖北興國州知州先
生乘小駟以巡鄉衣布袍而問俗洞知民隱不發私書電
掃訟庭曾無積牘庚桑入楚風移畏壘之民子香治荆德
感枝江之虎鄰邑民爲鄉豪所殺以自縊立案經其子上

控大府檄先生治之虛衷訊鞫悉得其情正不必設鉤置
距鬪智翹明卒能使孤弱氣伸豪強膽落神君之頌旁邑
同聲循吏之稱上官動色委解京餉回任卽奉旨特擢湖
南沅州府知府歌傳于藹名記王邱超越非因歲遷除拜
悉從中出先生潔清勵己慈惠字人但飲廉泉不然官燭
吳祐之竹書兼兩猶恐生疑范岫之牙管一雙尙嫌其費
美俗致中牟之雉勸耕買渤海之牛戶息懷甑人皆挾槩
廣徵之霖雨自足房豹之井泉皆甘古所稱良二千石者
先生足以當之矣嗣因失察屬縣諱盜爲竊之案竟議落
職邵公不肯錮吏張叔未嘗按人觀過知仁士論難之或
勸先生委蛇其道冀復職者先生曰吾精力就衰久思田
里得以微罪行幸矣又何求乎聽鼓者方輓鄧攸臥轍者
爭畱侯霸而先生乃單車就道襍被戒行誦樂志之篇尋

遂初之賦隱之裝儉但有琴書元亮園蕪唯餘松菊枕圖
靡史相羊翰墨之場抱德場和韜晦邱園之迹登山蠟屐
對酒漉巾縱釜甑生塵樵蘇不爨不以肩意也乙巳歲使
相福嘉勇公耳先生名延主蘭山書院投擊爲招傾襟作
禮倒屣而迎亭伯束帶而待潛夫劉瓛立館近依楊烈之
橋張楮傳經卽號公超之市青衿奉席緇布橫經授以咫
聞振之醇聽門下士如秦編修維嶽周主事泰元郭進士
楷皆一時雋彥也莫不揆張藻采跨躡風雲桃李之蹊旣
成斗山之望益重車盈問字之酒人饋束脩之羊被容接
者若登龍門邀品題者如附驥尾焉癸丑養痾歸里謝客
閉關士安風痺不廢著書伯業蕭衰依然嗜學無如凋年
漸迫宿疾難樹篤識巢門鵬鷺集舍孰賓孰主邠卿開壽
藏之圖在辰在巳康成受丹書之讖以嘉慶二年丁巳正

月十三日卒於家年七十有七先生內行淳深天懷曷明
奉親如汝幼異事長如庾叔褒眷懷舊誼逾分宅之郕成
篤念疏宗過讓園之陰慶彥輔名教之樂叔寶情恕之譚
僚采樂其寬和臧甬服其德量史稱長者易繫吉人先生
之謂矣加以夙耽著述癖嗜詩騷畢半百家貫弗羣雅俗
倫吹律而重徵經迭之辨必嚴輪扁運斤而甘苦疾徐之
妙自得情靈無擁意象獨窺煙雲卷舒金石諧婉所著松
厓詩文稿律古集唐諸稿俱已梓行海內傳誦雞林估舶
購白太傅之編蠻徼弓衣繡梅都官之句豈僅士林馳譽
名輩推工而已哉子承祖承福承禧共守青箱能傳素業
夏侯之門有建枚乘之後生皋以是年三月初八日葬先
生於北郊祖塋以先生易簣之時曾有遺言屬子誌墓胖
兢奉命連逮陳詞芳燦早謁李膺蒙呼小友久欽蕭奮願

受專經十載，降游舊荷牛心害。我九原懷舊難忘，塵尾交談敢染丹臺。備書穆行陳仲弓之令範，紀以二碑橋公祖之良謨。鐫之三鼎銘曰：

淵哉若人，真想在襟行不雕飾。恂恂德心，文筆高奇思業。湛深射策東堂，聲蜚士林。冲懷月和曠度春藹，初綰銅墨。遂要銀艾，屢書上考。百城推最惠洽，蒸黎文而無害。難進自居，稱賓免官。爲法受黜，行心所安。馬失更喜，甌墮弗看。一邱一壑，俯仰自寬。上相推賢，講席幣聘。庶士傾風，眾流仰鏡。河縣待酌鐘叩，斯應推獎。風流增益，標勝不猗。不訾乃昌，其詩鰲擲。鯨吐放爲偉詞，高身溟滓。細窮毫釐，金鎖名山。千秋在斯，憶奉譚譙。舉觴相對，共索古歡。多識前載，靈幽體翳。曩遊不再，歡音永闕。微言空佩，延之後起。玉溪小生，潯陽作誄。香山勒銘，巖巖樂石。鬱鬱佳城，敬遵古志。

式揚令名

福建臺灣府鳳山縣知縣卹贈雲騎尉世職吳君墓表

夫捐軀赴難識志士之成仁臨事決幾服儒者之有勇是以陽贊貞臣殉義滑臺之成杜篤文史戰歿射姑之山士君子職膺民社出綰銅墨值巨猾鈔盜兇渠橫行扞衛侯遮艱危搏戰迺至畢命鯨波之外橫屍虎落之旁骨鏃通中面創裂血如吳君者其節爲尤烈矣君名兆麟字德洲號雪槎江蘇無錫人高曾以來世守儒業四經並授七業俱興君考凝香先生諱某孝友性成行誼醇備藏經緯于不試樂優游以適生王彥方化行鄉閭汜穉春施及州里潛德不耀令譽自彰君幼而岐嶷長益慧邁凡將元尙小學早通魯說韓故專經能治葢君伯父工部容齋先生學士易堂先生均以經學起家儒術顯世后倉禮經七十卷

丁寬易說三萬言條篇撮指校羣書于天祿考同撰異析
眾論于石渠君仰承家學既有端緒兼以彊力殫其研求
遂能含香藝林擢秀學圃年十七補博士弟子員士流寫
公叔之書先達倒威明之屣赤鸚賦就袁淑遂匿其文黃
絹碑成魏朗亦焚其艸乾隆癸卯中江寧鄉試副榜屢應
京兆試薦而不售匡衡之試文學止得丙科擊虞之策賢
良僅登下第高才不遇識者惜之庚戌考取八旗官學教
習秩比師儒坐三經之席班儕都講集五館之生期滿引
見奉旨以知縣用未隨牒以謁選乃投筆而從戎時苗匪
不靖媿徒構逆福嘉勇公執靈鈔而盪寇乘琅鐸以平蠻
君以儒生軍門上謁短後成慶之服高前舞陽之冠卽奉
臺符俾轉軍餉星流電速士飽馬騰龍節如期蠶旗改色
事平幕府上其雋功選用越等戊午選授福建壽寧縣知

縣小邑寡民訟庭無事君以劉寵之廉平行阮种之簡惠
吏民同聲謂之不煩在任數月大吏謂君才足以膺赤緊
德足以撫流庸臺灣孤縣海外俗稱難治迺薦任延之才
換尹賞之縣君以親老固辭不許遂逾鯤身抵鹿港竦鳳
山縣事蠻落無城番民雜處宵小乘機交相煽誘急則鋌
險緩則養癰君迺寬嚴異施德刑互用龔遂治盜理渤海
之亂繩虞詡禽姦誌朝歌之綵綫時茲民吳光傳番賊三
巴六連結嘉義匪徒刻期起事君廉得其實密募壯勇將
賊目三巴六禽送省城正法賊黨兇懼揭竿竝起君躬持
露陌馬束殷繕度尙知兵景丹持重人蒙甲以成隊地艾
蘭以爲防契箭傳呼義兵距躍克靖飛頭之孽只如反掌
之間賊平君以鳳邑爲郡南要地不可無城議捐奉修築
以委解京餉不果逾年君差竣回任而懷輒之俗未革探

丸之黨公行君嚴金布之令設鉤距之法曾豪盡翦惡子
咸誅眾志成城千夫共膽方謂列戍無驚夷庚可塞也無
何鷓鴣星馳狼烽電警蔡逆全幫賊艇徑犯鳳山君杖劍
當門椎牛誓眾簡練梟俊結束弓刀射危檣之怪鳥落雁
名都殲聚窟之妖狐老罷臥道梟其渠帥奉彼牙旗士氣
方揚賊鋒大挫時乙丑正月事也至十一月蔡逆句結陸
路姦民復窺滬尾時總鎮諸公均備兵北路賊乘虛南下
逆匪吳利萬等糾眾應之斯時也壞雲晝壓駭水朝飛更
無鴉時之城可禦狼奔之寇孫恩萬舸眾號水仙張燕一
軍羣呼山賊蛇涎吹雨誰犁整虺之頭薑毒噓煙孰斷盧
亭之尾君乃身披越鎧手淬吳鉤剪爪設衣作書磨盾高
堂屬弟對法護而款歐愛子託人呼別成而慷慨孝侯臨
命賦詩迺幸令終新息誓師裹革方酬素願遂復橫戈直

入披羽先登觀者知君有死志矣旣而蘭干箭盡不偃倉
英之旗陰陵路窮終嬰伏突之刃力戰殺賊身被十餘創
遂遇害嗚呼哀哉大府以君死事狀入奏奉旨照陳亡例
賞給雲騎尉承襲賜祭葬銀一百兩入昭忠祠隸孤兒于
羽林祀國殤于宗布表無忌之節風勵于來茲念張曠之
功賞延于奕葉龍章恩重馬驢封高九原有知可以慰矣
君弟某子某艱難漏刃號泣招魂求君遺骸知爲高王二
生收護複衾明器以禮入殮血尙朱殷趾猶怒裂生時勁
髮上盡衝冠死後空拳握眞透爪嘉兩生之義烈沐三禩
之寵榮鯁渚鮒潯安返次房之骨犀軒蛻蕝遄歸穆伯之
喪羣母憑棺杞妻臨穴非君之忠孝上感神明而能如是
乎君生于乾隆丙子年二月初六日死事以嘉慶乙丑年
十一月十九日得年五十子某以丁卯某月某日奉君之

喪歸葬于某鄉某原復累君行事乞爲墓道之表禮也君秉性英淑負材振奇敦叔褒之素風修文彊之內行余與君推襟早歲投分齊年弟英燦又君之妹婿也締葭莩之世親託文字之密契自分宦轍遂闊燕譚癸亥君以解餉來都銜杯話舊其循短髮各愴離悰官事有程臨歧惜別燕雲北滯越烏南翔路阻重溟書傳隔歲鷹風動地將吹夢以奚之蜃氣成雲何相思之可寄遽傳凶耗喪我故人雖臧子源之志節千載如存而張元伯之交知平生已矣援來秃管愧我無文勒以貞珉期君不朽大書神道敬告鬼雄沴氣未消猶鼓長鯨之浪英靈不泯應飛白馬之濤嗚呼哀哉

容太空先生墓表

夫滂仁曠義爲抱道之俊民川蟠林潛有韜寶之君子蓬

邁自蔽介介常守其貞藜藿無糝坎坎不失其範探經術
之樞奧按道藝之喉襟規筴架模姓氏升于州乘儒宗學
府品望重于鄉評遺絢翰藻之聞賁華竹素之上如太空
先生者斯其人與先生姓容氏諱萬有字太空一字伯涵
陝西寶雞縣人也代有隱德世非曠僚閒出通博之才共
推方雅之族先生稟五常之性明三物于鄉幼卽恂通長
而秀時執古之醇聽味道之華腴穆行克敦純修是踐扇
文彊之枕浣石建之褰棣鄂連跼荆枝達枿抱子續季江
之嗣割宅成許晏之名汜隸之家兒無常父董陽之室爨
無異烟其制行之消篤也如此至若朱穆貞孤井丹高潔
拘蠶蠶以資養織藜苳以供餐適志自娛居貧何病不乞
胡奴之米自采周黨之薪嘗曰惟貧乃視其所不取設不
貧卽不妄取烏足尚也是則被季次之鶉衣溫于狐貉罔

北宮之莪菽美過珍饈其持躬之取介也如此若乃閱覽
典墳冥搜載籍折眾說而垂訓括羣言而暢旨蒼葢篇翰
鈎稽縉繩每斷帶以續鐙時蒸髮而焯掌虞書稽古刪秦
延君三萬言之繁魯論傳疑正徐遵明八十宗之誤窮源
竟委百川承流研精洞微六府如燭其嗜學之專精也如
此于是居萬流之屋爲羣士之師人餽束脩之羊門盈閭
字之酒以蒙來叩望若斗山以疑相質奉如著筴先生汲
引無倦講習不休傳六經七緯于緇壇儒林望重萃八索
九疇于函丈縱掖名高茂先成勵志之詩虞溥著勸學之
詰謂士以敦行爲本學以立品爲先臨財如闔文生之多
情守道如黃子艾之不篤雖擢科名登仕籍絕之弗與通
也是以四牆崇峻學術端醇使盛服者畏見子將盜牛者
遙羞王烈其立教之嚴肅也如此若夫握文字之璠樞表

言音之藻鏡翔實之學薄華語而不爲揜雅之材集方聞而益富辭源滂溢文陳縱橫今集中所存如考微碣之訛箸陳倉之辨證杜南蝕中之道疏昇原成國之渠以至黜炎書疏蔡邕碑誅莫不闡揚潛德刊削浮詞殫見洽聞切今轅古購孔文舉之集片言可敵班揚遊蕭穎士之門五尺羞稱曹陸其綴言之通博也如此嗟乎榮悴命也遇合時也擁鄭君之縹緲服曾子之緼緇帖書墨義大經雖通風簾棘闥屈聲屢振荆璞遭刑隋珠匿耀早年卓犖卽馳令名中齡冤天遂喪懿寶講義陰堂之奧委化知歸納書寢室之楹望畢遽息吁可悲已德配李孺人夙守閨箴克彰婦德善心爲窈含章可貞簪蒿杖藜爲偕隱之服挈茶茹藿甘食貧之風先于某年卒以某月某日合葬于某原先生之少子旭卽先生昔年與弟梅峯先生爲嗣者也乾

隆乙卯科舉人今任長安縣教諭恪遵庭誥不墜宗風奉
抱遺文乞余表墓某備聆穆行敢闕微言刊化臺元石之
文入魯國先賢之傳太邱懿範宜書第二之碑江夏高風
合擅無雙之譽

甘肅鞏昌府知府胡公墓誌銘

夫擅著作之才而張左不嫻吏幹播慈惠之譽而龔黃不
事文章卽有石室談經桑弧習禮雖表儒雅之望卒鮮編
簡之傳若乃十行奉牒千室鳴弦辭宗辯圃學貫九流縣
譜州書政標三異具通人之宏致爲大雅之兼才于息齋
胡公見之矣公諱紀謨字獻嘉晚號息齋浙江山陰人出
文定之華胄爲吳會之望族代承隱德世非曠僚考雅宗
公抱器幽潛舍滄履軌王烈以公方服物郭泰以盛德感
人州里歸高姻戚矜式公天質醇淑神識都長疇合之辰

孝敬發於至性驚彌之歲朗悟挺夫殊姿強記瞻聞驚其
耆宿英辭麗藻軼乎朋儔雅宗公秉性方嚴晨夕督課中
榆小榆寒威正肅甲夜丙夜誦聲不休雖在元辰不覺申
旦年甫十七依伯父于通州寄籍應試受知于學使金檜
門先生補博士弟子員荀卿署年十五始舉秀才最錯試
字九千乃得掌故旋丁母憂星奔南下哀毀骨立幾不勝
喪服闋應戊子順天鄉試中式舉人含香漸越令聞日起
趙壹上計司徒降階王符踵門度遠倒屣宜乎畢牢七略
揮綽三雍旋以雅宗公捐館聞赴南歸舉魚抱木而幾枯
崔九吹風而卽倒四時瞻拜每伏故匳萬里奔馳惟持遺
硯庠襲明發有懷二人鮑昭同氣實惟一妹孝友無間族
鄰稱之公愴艱棘之屢丁悲鍾釜之不怕忘情于進絕意
希榮堙暖自甘臞腴已甚遂學攝生之道求服氣之方朮

序芝圖丹爐藥竈拘蠟資養梓茹供餐後復遷于大房山中陰堂夜響似喚祁嘉石壁晨開欲迎辛繕八籌七釜靜讀仙經六醮十芒閒緝祕笈幾將守處子之耿介尋真逸以遨遊矣嘗夜夢雅宗公勛以宗嗣爲重竝命出仕以宏善果辛丑始出應會試大挑一等奉旨分發甘肅以知縣用含神霧以度世蒙厯禩以拯民甘肅當兵燹之餘爲華離之壤公乃拊循凋劫招復流庸濟扼扶傾風纒露沐孔君魚之清節出宰姑臧崔亭伯之高才遠官樂浪補鎮原令調署安定路當孔道輒傳絡繹公損供億之煩除征徭之累時逢大祲民困荐飢籲請臺府奏明蠲振先發倉廩以給餓者員半千能濟飢貧明山賓何辭耗闕起瓢囊之瘠均鍾釜之施全活者數十萬人調任中衛百姓攀留遮道涕泣三老上書願留焦贛一州臥轍爭輓崔戎大府體

察民情仍畱署任時有陝西鳳翔奸民雷得本倡立邪教煽惑甚眾公奉臺符馳往會同查辦既抵鳳翔人心恟懼公命設樂置酒潛以輕騎執其元惡十七人而歸武襄張欽遂已檢渠文偉圖甚竟能辦賊兩省官僚咸服公之膽識也丁未抵中衛任會

高宗純皇帝閱宋蘇轍元曹伯啟詩以涇清渭濁其說可據毛鄭傳注或有謬誤特命西省大臣察視大府素重公方聞博識因檄公與鞏秦階道李公殿圖分查二水公乃登笄頭涉薄落窮源溯流激清無滓恭著涇源記籍圖以獻奏上

純皇帝聽之學過酈元堪補水經之注功侔王景合賜再貢之圖大府由是益重公壬子調皋蘭首縣地界要衝邑兼赤繁案牘山積驛騎星流邊郡多奔命之書劾邑有疑

難之讞公從容應事剖決得情州次部居朱出墨人夙宵
不勒砥節首公乙卯擢安西直隸州瓜沙邊裔蒲昌瀚海
土性深厚人風樸淳公撫以慈和政尙清靜先是州屬常
有狼患公隸任後爲文以祭社神其患頓息巨猾張雄橫
暴鄉里間公至挈家遠遁終公任不敢歸虎真出境盜亦
奔秦強衝改節張歐未嘗校人惡子潛輟王渙無須著籍
盡革苛嬾之政遂變枝柱之俗古所謂以德服民者公之
謂矣方川楚教匪不靖公隨制府宜公至興安辦理軍務
復隨方伯廣公至階成籌辦堵禦事宜後因青海生番滋
事又隨制府長公前往剿撫鬻灰箭火矛浙劍炊磨盾作
書據鞍爲几跼穿膝暴口不言勞事竣大府以公歷年勛
績列入薦章特擢鞏昌府知府引見後請訓 上垂問青
海番地情形奏對稱旨鞏郡毗連楚蜀號稱難治公廉平

鎮靜眠庶乂安旋護理鞏秦階道六條馭吏九職鳩民農
戶優歸士鄉弦誦庚午以年當大董引疾乞休書疏再上
得如所請而積齡已迫宿疾不堪遽兆夢瓊奄沈連石遂
以是年九月十一日丑時卒得年六十有八公行合卺弦
操厲冰蘖含靈湛鏡蒞智成囊內行深醇交情篤摯寬中
如卓茂蒞藉如桓榮雋味無窮情瀾不竭張憑言旨玄遠
足暢彼我之懷韓康思理倫和能通古今之奧治獄則不
從奇請從軍則不邀雋功裴子野自刻已期任彥昇可云
知命生播高譽歿垂令名落落焉其有風飄者也公生平
酷嗜風雅述造甚富著有知足居詩若干卷文若干卷均
待梓行公元配潘恭人繼配嚴恭人俱名家女有淑德子
二定生衛生秀穎能文克紹家學茲定生于辛未四月十
七日將扶公匱歸葬于山陰之祖塋述公遺範前來乞銘

芳燦與公甘載同官交傾肺附稔悉行義不忍沈湮爰勒
貞珉敝之穹壤銘曰

文章政事本無二途樂情禮意慈惠以敷公性通悅大方
無隅恥與庸人羸竝拾驅少歲敦行規策矩模中年筮仕
智燭信符噓枯潤槁赤子扶扶洎要銀艾典籍是娛百家
五總波瀾委輸繁古循吏實惟通儒達生者傀達知者胥
委化知息畢如曠如身沒名豈丹青不渝我銘幽宮徵實
匪誣

瘞老馬文

敝帷之仁昔人所稱況我與爾曾同死生甲辰之夏跳踰
羣醜賊多於讎城小如斗涉波躍塹帶月登陣出人鏗刃
交橫旌旗慙余儘弱不習於騎賴爾深穩險迺克濟尋途
躑躅涎頰摧頽嚼齧齒長伏擬鳴悲交爾管魂高原嶺翠

秋艸彌山誰知奇骨

桐華館文

金匱楊揆同叔

荆圃倡和集敘

昔元許左丞可用與其弟可行倡和楚人馬融及其子植與焉今所傳圭塘款乃集皆閒適之作也蓋其地則平泉綠野其人如正始元嘉機雲之屋東西求點之山大小蘭亭高譙諸子得預勝流蓮社佳遊門生亦參未座烟霞獨浪魚鳥相羊其屬思之清工非緣選會之超曠歟余與伯兄弱歲饑驅早年薄宦西羈隴坂北滯燕臺夢永嘉之西堂憶懷遠之故驛離索之感殆不可任既而兄馳上計之車余守校書之館第五韻靈臺之下或十日不炊董威輦白社之中無一廛可庇衡門風雪衿素蕭然遂乃尋避債

之臺移乞病之牘同車入洛聯轡過秦陟三嶮之嶮巖覽
二華之奇秀蒼茫弔古悵悵懷鄉別薛看碑磨厓灑墨樊
川句裏老樹遺臺長吉囊中神林鬼豕循省所作羈旅爲
多况復官齋共被未及三旬幕府從戎又逾萬里長征歲
暮黃河已久遠別魂銷青海無極空抱矛浙劍炊之懼媿
非投觔擲盾之才而兄一障空桑十年不調原鶴隴雁嗟
子季以來歸塞卿關榆盼阿干而不見傷離憶遠悵悵如
何今夏余任甘藩兄視余官舍塵被纔奉離心已攄爰開
庾信之小園做潘尼之閒館洛瀕之集許仲容同遊臨海
之詩屬長瑜共和水木明瑟風光澹沓霞初星晚不無竚
興之辭等底尊前時有言懷之作自謂廿年以來未見此
樂然而文案鮮暇邊徼未寧當赤白囊之交馳及朱墨圍
之錯置敢耽吟而廢事聊假日以銷憂以視圭塘之嘯歌

自適者其境迥殊無怪乎言之未能工也顧篇什漸多不忍棄置爰借伯兄哀輯付梓而余又量移西蜀慨轉轂之莫定感搏沙之靡常尋函中之作每憶前塵題漢上之袞預期後會聊將袍襖鈔播拮之詞偶記年華當樓羅之厓云爾

辟疆園文

金匱顧敏恆立方

重脩梁昭明太子祠碑文代

夫人能照物者必貞金石之壽文足行遠者不絕椒蘭之芳故有前星淪耀乃并照于古今少海迴瀾或均潤于幽顯風徽尙存降監不遠俎豆尸祝其何閒然貴池縣西廟者故梁太子祠也秩祀于唐錫號于宋懿神之德昭乎簡文之敘炳乎王筠之冊粵稽前史厥有明徵瞻懷此都尤

著靈異，聰明仁孝之美，不介自孚。水旱癘疫之災，有禱必應。亦已書之銀管，勒以穹碑。紀載班班，弗可贅已。或謂神與齡未驗，當璧無徵。使景命之在躬，行蒼生之蒙福。不知大厦非一木所支，鹹池非敝筭可救。青絲白馬，壽陽之敵騎紛來。葦席邪巾，西鄰之責言迭至。晉安罹吞土之厄，湘東邁推刃之災。惟神生榮死哀，不與其難。斯吉人之獲祐，非天道之無知矣。或謂神降靈襄陽，立儲建業，高齊非石城之館，原廟豈秀山之陵。撫是方隅，罕聞警蹕。不知撫軍監國，利賴實繁。臨水登山，傳志多闕。訪舊聞于故老，索陳跡于廢墟。橋陵弓劍，葬軒帝之衣冠。芒碭風雲，瞻高皇之魂魄。棄空馭氣，何所不之。金蟬翠綉，仰止斯在。不可謂神之無功。其地弗福，其人也。或謂神揮扇返風，饋糧振乏。事多幽渺，迹涉玄虛。不知白龍化去，尙憶釣車。大鳥歸來，仍

棲冢樹申生佩玦且通夢于新城子晉吹笙亦昇仙于緱
嶺考諸曩昔不少靈奇豈盡鄒衍之談天齊諧之誌怪乎
廟之規模夙稱巨麗璇題納月金爵承雲曰文選樓存古
蹟也有殿祀其先推孝思也閱有歲年漸亾舊觀丹青剝
落粉墨彫昏崇垣就圯則輒壁零星雕甍欲傾則風日穿
漏余職在守土愬然於心爰出奉金以倡紳士竝命僧嚴
達募之四境以廣檀施鳩工庀材縮版揭土於乾隆戊戌
春經始以己亥秋月訖功輸奐增美像設維新更拓前規
創置舞榭歲時享祀婆娑樂神是役也輸金者麇至執事
者鳧趨藉英靈之庇蔭順民庶之豫歡將比大梁舊國長
懷公子之恩豈若吳興故堂特畏憤王之怒也哉旣告厥
成謹刊之石

眞率齋初稟敘

僕與蓉裳楊君託膠漆之密契有葭琴之世親駉負而瑩
趨蟲鳴則各蝨躍淄澠同器笙磬共音中心臧之爲日久矣
乃者哀所述作錄其詩歌授簡鄙人俾爲之敘夫良玉旣
剖不待卞和之泣血也利劍旣躍不待茂先之望氣也僕
學無淵源詞乏文采而稷下杜口早聞魯連之談東鄰奉
心先識西施之貌情在於是烏能無言君秉氣英淑負材
經奇衿被蕙風被灑蘭雪清談而霏屑如鋸列座而無衣
不寒徙倚永日移魏收之胡牀沈冥下帷銳管窻之木榻
凡汲冢斷簡龍威祕文夷吾所知者七十二代曼倩能誦
者二十萬言庶以陸公之廚貯以邊韶之笥胸咽丹篆掌
盈墨書竝遺糟粕嚼菁華笙簧六經肴核百氏故其所作
如威鳳五色仙霞九光錦巔繽紛瓊葉麗籥然龍燭以照
海建翠旂以翳天閭者動心觀者眩目子季父響泉先生

每日蓉裳之才可云秀絕寰區庾蘭成之麗藻日以清新
揚子雲之瓌詞謂之淡雅別有眞賞不同妄嘆也憶在弱
冠卽罹屯災王哀廢其蓼莪原憲羹其藜藿耕石不富倉
穰何肥時則願爲博士讀元家之異書將游大人挾齊客
之鳴瑟或割瓊以遺江革或倒屣以迎仲宣見說難孤憤
願與同遊諷游山九吟幸其竝世人思薦禍眾共推羊雖
未能問道璇華校書天祿而方襲裾以謁吏部旋束帶以
從督郵仄閭仕宦之鄉是昔要荒之服天高日淡地古沙
平弱水西流黃河東走馬嘶風而噴玉雕睇野而生雲君
於是時飫黃羊之饌擁青兕之裘弦邏逆之槽酌蒲桃之
酒此間才子不異從戎何事參軍但工蠻語必且以兒女
之情挾幽并之氣陽關三疊甘州八聲混沌高謫防風起
舞他日者傳之以一雙黃鶴遞之以千里明駝當使曲中

楊柳倍覺風流塞上焉支別增顏色百茲有事於剖珠恐
見譏於倚市而君方以廣思益集參稽夫豈海神匿跡堅
避畫工長康隱形見欺蟬葉所可同日而語哉況乎一別
千里相思各天尋君紫邏畏逢吹夢之風寄我翠鴛慮有
沈波之字寘此懷衰如聆音聲是又僕一人之私而與君
兩得其願者矣祖帳將設離尊欲傾聊書所懷并以爲別